




1	4
1555	
206	

206



門 44
號 1555
卷 206

昭和十九年
四月十日
購求



校刻 集序

內閣中書舍人趙懷玉譔

蘇氏斜川集南宋以後流傳已寡康熙閒有

詔索之未得故四朝詩中祇錄一首以存其真自餘贗

本大率因謝幼槃劉改之二人名與叔黨相類竄其集

以欺世東南士大夫家置一編而不覺近日蜀中有新

葉斜川集亦龍洲道人作也乾隆辛丑冬集大興翁學

士蘇齋脩東坡先生生日之祀學士手編示余曰此叔

黨斜川集從永樂大典錄出可以證諸贗本之非乃取

集中大人生日詩邀同人和焉會請急南下未及假鈔以爲耿耿越六年丙午客授桐鄉偶語鮑君以文則以文已先屬其友人仁和吳君麗煌錄寄喜極欲狂亟索校閱有可據引者條疏於下雖未能復宋本舊觀廬山面目庶幾可睹矣夫人情於不易見之書則尤思慕弗釋必力購得之而後快矧祖考名德奕世稟承其文爲史傳所稱其行爲家庭所誦光靈未泯簡冊亦神宐爲世如何珍重哉今觀其詩文具有家法東坡好和陶而叔黨有小斜川之作東坡善言兵而叔黨有論黎事之

書出處進退未忘家國使天假以年名或不在其父下惜乎身處末流仕又再黜輾軻道死不獲措其蘊於天下是則才人之不幸夫然四庫之積浩如煙海君文於其間直一稊粟耳沈晦伏匿至六百數十年而卒顯於右文之世不可謂非幸矣是集著錄於宋史藝文志爲十卷陳氏書錄解題馬氏通考卷數皆同永樂大典所錄殘佚之餘厘釐六卷乾隆丁未四月付梓中間作輟涉冬而後藏事商榷讎勘以文一人而已乾隆五十三年歲在戊申春正月

古歛鮑叟以文僑居烏程之烏鎮有年矣余承乏
斯邑今歲夏五月大中丞方公持節來浙欽奉
諭旨鮑廷搏係何功名所刊知不足齋叢書二十五集
之外有無續刊等因方公莅任卽檄余造盧傳詢
鮑叟隨以所刊叢書二十六集恭呈

御覽

皇上嘉其好古績學老而不倦特沛

恩綸賞給舉人時首儒生膺茲

曠典洵士林中千載不易觀之榮也鮑叟雖年臻耄耄

精力未衰繼目今祕冊奇編鏗而不已於以仰副
聖天子崇學右文之盛意余爲董其事并捐俸入以速
其成焉至其書蒐羅之富決擇之精警勸之審固
夫人而知之矣余不更贅嘉慶十八年歲次癸酉
八月朔鍾祥彭志傑識於烏程官廨皆大歡喜之
軒

題辭

校錄斜川集寄鮑以文

仁和吳長元 麗煌

蠻煙蠻雨獨相從筆下波瀾嗣乃公人誦高名瓊海外

天畱遺橐玉函中 鈔自永樂大典 清游乍識匡廬面 舊時行世皆贗本

晚景還傾靖節風 叔黨晚景以淵明自况 寄語隱湖毛處士蘇門

會策汗青功

吳麗煌寄示斜川集志喜

歙縣鮑廷博 以文

湖陰水竹繼高蹤海上文章喜几宗蘇氏昔元推怒虎

蘇氏三虎季虎大怒當時語也 葉公今始識真龍颺風一賦猶堪補風

賦從宋文 小圃三詩那更逢惠州小圃五 欣賞不忘知
鑑補錄 詠僅存二首
已共遠煩千里手題封

斜川集卷第一

肩山蘇 過 叔黨撰

正月二十四日侍親游羅浮道院棲禪山寺

懷玉 李坡

集有正月二十四日與兒子過賴仙芝王原秀才曾曇穎行全道土何宗一同游羅浮道院及棲禪精舍過作詩和其韻寄邁迨一首是為紹聖二年作

淡雲曉蔥籠野水清可揭山明草木秀百里見瑣細人
閒境愈靜地暖春先逝桃李已青枝落花空覆砌涼風
稍可愛習習來衣袂赤日雖未苦炎炎逼裘毳道人疑
有道羽服襟裳弊晨齋爨無煙舍糗聊卒歲空堦拍筆

撥破屋緣薜荔拄杖挑筍蕨折柳樊蘭蕙居夷信何陋
卽此可遁世敢師浴乎沂不數山陰禊人生行樂耳四
海皆兄弟何必懷故鄉吾駕隨所稅

人蔘

懷玉案紹聖二年坡在惠州有小圃五詠此
首及枸杞一首蓋是時同作而佚地黃甘菊

三三

草木異所稟甘苦分炎涼人蔘獨中和羣藥敢雁行雖
微瞑眩力頗著難老方譬之古循更有益初無傷安神
補五臟自使精魄強羅浮仙者居靈質不自藏移根植
膏壤極葉榮以長東南雖異產遼海誰能航誓將北歸

日從我涉漢湘種之眉山陰得與伯仲嘗

枸杞

春槩擷新芽秋篋得紅實霜根釀我醪色味兩奇絕老
人鬢已絲處子何由得早佩斯人言百歲真瞬息今我
幸未衰妙藥况咫尺食前得珍蔬新釀掃故疾瘴海風
土惡地氣侵腰膝元鬢或偃僂禿禿顏已墨西河安可
冀北歸願如昔區區摘蒼耳麤陋非所敵

次韻叔父浴罷

懷玉案子由浴罷詩載樂城後集
紹聖四年坡在安化軍有和詩此

蓋同時
所作

黃門昔萬機下士勤握沐今已與世疎雅志追沂浴丹
田有宿火如比陽來復轆轤自轉水離坎俱實腹謫居
百事乏惟喜薪水足時濯西風塵一寓歸鴻目勿驚髀
肉少衣褐真懷玉明鏡雖無垢新苗良待沃雨餘餐巖
岫露重膏松竹更觀雲入山心與境同熟道書如雨初晴雲入山林
之語珍重者城言妙解何須讀潔香非外求清淨常返矚
物初信可游儻來非所卜益師莊叟言養生貴緣督

次陶淵明正月五日游斜川韻

懷王案坡和陶詩有正月五日與兒

子過出游作是為元符元年在儋州作

歲豐田野歡客子亦少休糟牀有新注何事不出游春
雲翳薄日磻石俯清流心目雨自閒醉眠不驚鷗茅茨
誰氏居雞鳴隔林丘曳杖叩其門恐是沮溺儔但苦鳩
舌談爾汝不相酬築室當為鄰往來無憚不澄江可寓
目長嘯忘于憂儻遂北海志餘事復何求

五色雀和大人韻

懷玉案五色雀詩元符元年坡在儋州時作坡詩序云海

有五色雀常以絳羽者為長進止必隨焉俗謂之鳳皇云久旱而見輒雨潦則反是子卜居儋耳城南嘗一至庭下今又見之進士黎子雲及其弟成家既去吾舉酒祝曰若為吾來者當再集也已而果然乃為賦詩

神雀來何從飛鳴自為徒尊卑有定分眾色敢亂朱與

公作新年贈禳陋桃符南遷不見鵬屢集升平鳥柳仲

遷宮必鳥集升平第五日乃散翩然自靈物豈惟眷庭梧年來翟公門

寂寞誰與娛瓜田豈故侯環堵真前儒雖知非天窮嶮

阻殆切膚海南夷獠窟安得此異雜似為三足使仙子

儻見呼定知隱几人嗒焉非昔吾不願宴西瑤東華返

舊都

冬夜懷諸兄弟

懷玉案此
任脩耳作

霜風連日惡霜月連夜苦青燈寒無光翳翳昏復吐念

我手足愛相望若秦楚兩兄寄陽羨耕稼事農圃簞瓢

有餘樂菽水未為窶兩兄客潁川耿耿懷去魯近聞營

菴裘稍亦葺環堵有弟雖咫尺相逢猶齟齬黃鸞隔小

海孤嶺度大庾今年厄陳蔡夫子嗟兕虎惟我二兄弟

頗亦嘗險阻憶昔居大梁共結慈明侶晨窗惟六八夜

榻到三鼓豈知聚散事翻手如雲而我今處海南日與

漁樵伍黃茅蔽澗谷白霧昏庭宇風高翔鳴梟月黑號

鼯鼠舟居雜蠻蠻丹服半夷虜下牀何藥餌遺瘴煩樽

俎何須鳶墮時方念平生語

次韻大人與藤守游東山

懷王案坡元符三年九月離廉州至藤州有游

東山詩題云徐元用使君與其子端常邀僕與小兒過同游東山浮金堂戲作此詩徐元用名

壽坡作抗時為仁和令

灘聲已悲秋，澗色猶藏春。駕言東山游，緬彼于載人。使君平陽意，客至但飲醇。風松作鼓吹，迎送長江濱。爾來乘桴翁，歸路物色新高情。寓真頽絕意，登麒麟。三吳有負郭，穰極秋盈園。瘴茅喜欲脫，下澤還當巾。縹緲九疑行，此生定知津。故人儻見思，尺書憑素鱗。

將至五羊先寄伯達仲豫二兄

懷王案此元符三年侍坡離廉過藤

梧將至廣州時作坡亦用韻以寄邁追時邁與家屬在惠州追在常州坡詩云大兒牧豕穉四歲守孤嶠次于病學醫三折乃初曉

人皆有離別，我別不忍道。惟應付夢幻，事已共一笑。憶昔與仲別，秦淮匯秋潦。相望一葉舟，目斷飛鴻杳。伯兄陽羨來，萬里踰煙嶠。未溫白鶴席，已饑羅浮曉。江邊空忍淚，我亦肝腸繞。崎嶇七年中，雲海同浩渺。豈知羌村晚，驚拜杜陵老。干戈雖事異，歡喜動夷獠。山川舊悽慘，雲物今清好。不似元都桃，秋風不堪掃。

送張仵政赴闕

信馬來并州并州在何許太行如登天憔悴欲誰語青
衫百僚底屏氣不敢吐謂當哭途窮何但折腰臂忽逢
元紫芝仰視得眉宇敢論通家舊竊欲比文舉先君與
叔父嘗
待交於公之王父使君況不凡高論傾肺腑能容丞掾
甚有一日之雅醉不問車茵汚念我上壘人老矣事簪組端如赴縲囚
坐受獄吏侮感公懷抱開一笑忘羈旅雖知抱關惡未
忍賦歸去相從僅滿歲公已歌杖杜秋風忽零亂吹盡
西山雨定應催行色不遣車輪阻天街早飛鞚鷓鴣看
接武青雲豈難到少展垂天羽區區亦自憐從此歸農

圃

郡守禱雨獲應

秋陽六十日閔閔歲可懼原田龜坼塊城市塵沒屨誰
歎悲若人活彼於旦暮精禋發仁惻誠意輒上訴神山
闕靈湫水旱天所付潛虬懶廢職暴虎社鬪怒抑無東
海冤又豈柔羊蠹天心自響蒼民語酌道路嗟予生理
拙飢飽共農圃披衣夜不眠聽此簷閒語沈疴忽去體
黃壤流膏乳少寬縣令責盡復南畝故呼兒酌我酒欲
寫無佳句聊同千里謠非公誰與哺

再和

吾君如湯仁常爲無災懼一夫恐不獲貿貿悲輯屢二
斗東南憂詔書走晨暮陳陳發困廩粒食不待訴知公
經綸手故以民社付汪然叔度陂不見偉節怒德星所
臨次民瘼消朽蠹祝祠往無愧飛雨來半路耕犁及二
麥浸灌休老圃何人執筆書爲瑞非虛語應言潁川鳳
未要猫相乳益欣獄訟少三尺略細故丞掾從歌呼謠
謠入章句謝公未賦歸赤子猶待哺

題劉均國所藏燕公山水圖

江湖半此生老去徒見畫看山眼已足涉險夢猶怕老
燕久黃壤遺墨獨未化胸中有丘壑故遣意匠寫會逢
知音人契此筆端話故山當早歸誰是知津者

顏樂堂

恨無阿堵君一區今尙欠且謀蔽風雨拔草聊自苦低
深人易安儉陋鬼不瞰寧辭力少勞還視家無甌從來
生理拙况此歲屢歉故將筆瓢心聊作梁肉砭堂前有
甘井汲取良未厭堂後有藥苗一飽亦可暫胡爲不歡
樂何事貧憂詔作詩置座右勿使斯言玷

與范箕叟避暑西湖

快哉楚王風庶人安得共西陂
浩無價不計吾僦用承
日不可暮窮居厭塵闕出門有佳詣
咫尺窺潭洞危樓
俯木杪大厦森高棟戶牖交梧楸
蒲荷接蘋葑閉持枕
簟往遽起江湖夢醒然涼肺肝
習習吹衣動世閒賤易
得清風誰與重勞生不自覺
至樂那容衆北窗與君享
世網念少縱肉食固肥甘輕塵沒飛鞚

陪郡守遊西湖泛舟曲水分韻得會字

謝公志東山杖屨未冠蓋與成江湖遊意落軒冕外陰

陰聳夏木瀏瀏鳴溪瀨
擘舟破菰荷尋徑穿蕭艾
新亭水心見倒影飛虹背
青山忽入坐境與人意會
公詩如干將游刃天宇大
西湖真小鮮殊未供刀
鱠雲煙日相劇媚嫵分晴
靄妙語瀉瓊瑰化工應有
待

同趙伯充遊曲水趙氏莊分韻得抱字

三春失行樂風雨與病惱
忽驚節物改樹密鶯聲老
濫陪閒中客載酒尋芳草
東郊縱所適蒼莽事幽討
誰歎有隱居谿谷相鬱繚
疎籬映脩竹叩門許徑造
主人雖鋤耨好客白灑掃
結茅年種木今合抱飄然
佳公

子忽弄松風操絲桐豈能爾妙意超物表歸途嘆危橋
月上千林縞茲游非人寰俗耳不可道

和叔父移居東齋

懷玉案穎濱詩載樂城後集
題曰晉東齋三月十八日

去鄉三十年夢寐猶西土陋窮未能歸諒亦君子固結
廬冥穎間絕意爲霖雨聊清一室地僅作跣趺處邇來
又謝客不待羨蝶釜西齋舊翳密日晏窗先暮東軒得
爽塏真作禪侶住

公舊自謂
東軒長老

陶潛採菊時尙復有真趣

公今觀此心湛然忘客主坐了一大緣固已遺能所

次韻岑彥高史強木春日書懷二首

二豪以詩鳴優劣孰敢分縱橫閱萬卷何憂備三鄰終
年發揣摩秀句吐陽春誰云不苗裔安取三百困汝穎

素多奇世不乏孫陳

遊家詩
故作孫

著書效潛夫奏賦嗤陵雲

哀時無祁奚丹書誰爲焚儻令試一割晉盜當奔秦德
業闕不耀天欲昌其身定交乃余求不貴白髮新從此
杖屨數爲子掃榻塵高談看疊疊揮塵落紛紛

逝水不可復百年行中分自嗟齒髮故晚境桑榆鄰節
物謾消長枯荻不知春軒裳歎雞肋雀鼠盜廩困學藝
晚愈拙彈冠力難陳澹然忘出處任此無心雲世路羊

腸險恐遭象齒焚何如老山澤憔悴非逃秦嵩少幸咫尺雲泉許容身平生餘嗜好舍舊當謀新安心本無法妙理契折塵優哉真萃歲豈復悅華紛

寄題撫松堂

胸中朝市遠何必擇所居門無結駟客山林入吾廬西洛有君子築室城之隅種松在庭戶志與淵明俱朝搨西山爽莫尋南湖娛霜中鶴骨瘦雨夜龍髯疎主人應相似節抱陵雲孤不知寒暑遷官徇世俗趨昔稱水南北去曳侯門能伴松菊老固知涇渭殊我恨營口腹

斂板慙妻孥三逕未能歸高臥子不如青衫滿塵土何時返樵漁未用北山移我來只須與

寄題北海文舉堂

巨君竊漢璽如取鴻毛輕孟德老且死不見姦業成乃知朝無人誰憚百公卿一夫能仗節介然屹長城忠義國所託安危與之并吾於文舉見坐折姦邪萌誰能搏猛虎乃用尺箠嬰義氣橫宇宙不煩尺寸兵悲哉天所壞一木難扶傾鼻鸞不兩立夫子安得生中原竟分裂三姓鼎足爭當知千載後高名獨崢嶸使君定不凡論

友古豪英作堂追餘烈豈祇求空名廢卷屢歎息孤忠
誰發明玉石痛俱盡鯨鯢脫誅烹嗟余志謬懦怒髮猶
衝纓九原不可作涕淚徒縱橫

和王仲弓雪中懷友之作

懷玉案仲弓名寔
王文恪樂道之子

出門無所之懷刺名欲滅要求我輩人庶緩禮法設城
南有勝土塊坐方禪悅不嫌來往頻相對登壇雪
我非淳于狂君勿怖燭滅時能啜少醴誰為穆生設明
窗坐弈基聊以寄怡悅勝固無所爭敗亦何足雪

次韻少蘊移竹於賈文元園二首

時倅車乃
文元裔孫

猗歟丞相園中有歲寒根千夫屹冠劔坐閱雲來孫當
年擁節旄雅志在淇園琅玕映城郭琴筑鳴潺湲春筍
半出林橫鞭爭觸藩坐陵霜雪氣高壓桃李繁年來王
子歛來乘刺史軒請分一畝陰自訪三家村賦詩屬公
考益遣交情敦一雨飽生意莫嫌池水渾

我公經綸手胡為試盤根忠言與嘉績有後期臧孫胸
中五千卷三歲不窺園種德如川增源深自潺湲遠辭
承明廬出備諸侯藩仁風被草木已覺棠陰繁此君況
手植伴公讀書軒未須勞越吟寓目聊江村羣豪爭吐

奇和詩相勸敦愧無崢嶸句往繼火陸渾

送在庭姪領漕歸蜀

伯祖昔為郎出乘使者轡德星照東蜀遺愛及後昆登
車問民瘼手拊創痍痕遂使吾蜀人不知獄吏尊迨迨
六十年乃復見曾孫曾孫早讀書待詔金馬門一選文
昌省駸駸西掖垣凜然七尺軀雲夢不足吞乃居嚴徐
閒甬齒吐吻脣青雲豈不願局促畏短轅收拾五車書
歸掃西山墳平生有家學舍魚取熊躡況茲甘棠俗尙
懷挾纊恩上以慰慈母一笑請平反下以慰父老俯不

作九原更酌老翁水我為歎此言

和母仲山雨後

懷玉案樂城後集有見兒姪唱
輒次韻五首即此雨後諸詩也

柴門似郊居煙草碧萋萋君能慰幽獨數面情已眷山
雨洗茅屋耳目清如浣憑君發妙語筆有書萬卷

杜陵有佳句久旱雨亦好從教怨行旅頗

一作頓

覺慰父

老我似廣文貧飽食平生少忍飢山澤儒未易窺三島
西湖跬可至不畏城圍阻芒屨與竹杖穿泥未為苦清
波暗萍藻中有芙蓉吐驟雨真可人新荷亦掀舞
能琴何必弦但曉琴中趣學道何所得知迷即真悟嘗

觀指非月要似足忘屢歸言無所歸茲焉定歸處
吾廬不知暑心閒自清涼醉鄉豈難入不假陶令觴白
髮我摧朽青雲子軒昂溪山會先往簪組未汝忘

和范信中雪詩二首

春事已稍稍雪泥阻遊觀壯心本無多老境嗟易闌念
子功名士早嫌懷與安棄繻事遠遊肯待齒髮殘世事
屬廢耳
餐急流成一快勇退人獨難慎守林
泉幽莫辭松桂寒餘齡付空寂粗免非意干願同王翰
鄰未暇貢禹彈糝糠身外物況復子所歎

君家寓城市乃有山林觀高高復下下卜築殊未闌昨
夜三尺雪閉門學袁安且欣麥隴足未怕紅梅殘誰憐
屬國蘇取羶臥自餐欲尋鳥道往反畏屐齒難凜凜谿
邊竹倚空爭歲寒儼如十萬夫玉山方總干悲風動騷
屑伴我長鋏彈布衾冷如水敢效無魚歎

小雪

小雪不盈寸陰 可 凜冽那堪平地尺柰此衣百結天
公固念民已兆豐年悅不知貧與富苦樂相懸絕沈沈
五侯居碧瓦映華稅獸炭麒麟紅銀瓶黃封揭春風遶

幄帳醉面生綺纈賜一光宮玉色迷金闕誰憐華門
土破壁穿飛屑一別常見納履指屢浹夜長不可度
薪溼何由蒸飢口數更鼓坐歎生理拙寒暑有代一何
須怨窮達猶勝臥穹廬破瓊空自齧

湖陰有隱君子作軒一獨樂鄉人常希古為賦詩
屬予同作寄之

吾聞顏氏子簞瓢歟有餘不知外慕樂服膺在詩書君
看軒冕榮其辱與一俱斯游豈不遂上蔡曾弗一何伏
無已時循環共一塗賢愚但相笑莫知改前車嗟我晚

聞道一官真遺廬得之不為喜失之分所無塵垢未忘
掃冰炭久已除蕭然百憂釋夢覺雨干干江南有高士
樂名其居嗜不同眾好德則良不孤磨鉛事簡策校
獨勤劬持此返返藏不願拾柴朱黃卷有晤語捨茲
無與娛安得乘扁舟訪君在五湖

送梁與可赴中山倉

達人無畛畦從仕聊爾耳言辭將軍幕去作倉庾氏君
懷著雲夢尙有恢恢地眷此亦鴻毛何足為軒輊相君
澤未遠風流王謝比滿牀簪芻閒乃見山林士嗟余南

蘇川集卷一
畝人投老坐關市蕭然見眉宇真足忘聚饒平生南陽
館市駿得千里帳中三千客不數曳珠履要知磊落人
臭味同蘭茝翻然若鴻鵠飛去今無幾我行抽手板亦
復還未耜安能久俛首自困刀筆吏

葉守奉詔祠神霄二首

帝子閔下士符臨于柱宮來如月照夜去若電掃空馨
香薦明德降嘏初無窮靈光每下燭陋彼齋房中大道
含一地天本相通精誠貫白日閭闔來清風俾爾仁
壽域不宰造物功眷言蘋藻微報施良已豐

正直神所子誠存邪白閉齋壇夜寂寞天風吹佩環想
像鸞鶴駕雲霞隘空山翩躚款帝闈羣馭相追攀屏息
百慮空凜然夜氣還心灰塵埃境迹寓冲虛閒益守清
淨化俗情開昧頑無聲頌文德庶幾窺一斑

北山雜詩十首

長元案此十詩放翁有和
作見劔南藁四十四卷

慟哭悲素秋言登北山脚昏埃迷滬嶺疲馬戰犂确歲
月苦易得俯仰成今昨山雨壞古道春淙變谿壑飛妖
雖已息空穢那堪穫農夫抱耒歎四顧淚雨落
空山寂無聞獨擁寒鑪火時時黃犬吠知有行人過扣

門但樵叟束薪求售我辛勤易一飯空腹安能果我困
亦無幾僮僕行憂餓明朝且食粥彈鋏悲楚些

霜餘木葉脫浩蕩風千里簸搖茅屋下布被冷如水吾
貧亦巧紙帳陋紈綺柴門任軒吼曉夢方清美牆東
新鑿牖朝陽催我起安眠愧耕者隴月射牛耳

十枕不能寐牀頭井百尺轉轆下長綆鏗響鳴山骨分
甘徧鄰社甚旱猶湍碧烹茶沸小鼎自撥寒灰白默默
誰與語扣門惟木客坐念魯兩生壁閒有陳迹

默李吾所畏文字班馬流空齋鎖長夜尺牘橫吞舟誰

令效方朔顧盼侏儒羞不如談天李高論隘九州能爲
齊諧語自許監河侯浮沈間里閒與世真無求

西南望平原汝水稻千頃黃雲卷穰穰懷我江湖境扁
舟五月時潑眼菱荷淨歸來逢歲惡半臂換湯餅悵望
雲子白悲辛殘炙冷采薇聊卒歲雅志在箕穎

居閒本可樂閒久復難度此心苟無著永日未易暮平
生有習氣但對黃卷語詩書與博奕等是忘閒具不如
觀此心安用徒勞苦湛然返靈源當求無所住

濛頃山頂雲欲雨晝昏黑似聞田父喜茅舍有點滴今

年秋有蜚不敢藝兩麥天公猶見憐一犁應不惜我雖
厭泥濘與爾同休戚洗洗有遺種更望雪三尺
羶裘禦霜風從人笑胡服長齋似浮屠逾月不知肉東
鄰有病媪髮白垂鸛鶴擁寵坐無衣何曾飽脫粟哀哉
天民窮壽考非其福同此覆載閒我生良已足
山月半輪出寒光射天明微雲掃何處萬籟沈無聲褰
衣步東嶺彷彿游化城下視寰宇閒醯雞等營營余幼
好奇服簪組鴻毛輕羽人儻招我攜手雲閒行

餞任況之

我如支離人自負百鈞趨羊腸路九折偃僂纒半途道
逢任夫子忽焉巾柴車問君當何之駕言返舊廬息肩
子有日我愧今不如嗟哉妻孥累口腹亦見驅一墮世
網中局促轅下駒秋風送鴻鵠萬里翔天衢蓬瀛豈難
到定笑山澤癯那知羈旅懷扁舟夢江湖行當投劾去
暮景收桑榆願回結駟駕時過原生居

三月十九日同仲豫兄長率崔遐紹趙漢英游朱

園放魚

何人潰溪流忽作甌建屋不知幾魚蝦生斃此枯瀆纖

織躍泥沙濡沫曾不足雖求升斗活終困螻蟻毒眷余
二三子行春訪倚竹危橋得小憩涸鮒哀窮蹙汲井叩
鄰里捐金勸僮僕好生人所欣稚子助學掬要令徒窟
宅終免愧口腹瓶罌得千尾不滿百錢贖勿輕其微細
有知異草木蟻蜂雜君臣蝸角戴蠻觸君看長平戰一
舉百萬覆擾擾大塊中鉅細同倚伏達人齊萬物愚士
蔽一曲慎勿廢此言小惠何足錄

歲暮見懷

懷玉案此詩似海外寄遺迨
二兄之作題下疑有關文

所願非富貴甘苦同友于長衾與大枕共寢從懸弧爾

來萬里別南北如囚拘一夫苟不獲仁聖惟予辜而我
三兄弟飄泊海與湖

紛紛月挂樹征人念行路行路何茫茫誰爲供屣屨努
力治蕪穢公歸定非暮東門會祖道歎息兩疏傅滌器
當自今歸歟不愆素

次韻孫海若見贈

用子美詩蘇侯得
數過歡喜每傾倒

碌碌抱關好孰爲賢與愚休歌紫芝曲且和南郭等達
人齊萬物軒冕等塊蘇

神仙河渺茫羽人想丹上讀書悼無成賣劍行買牛眷

此三萬軸傳家無鄴侯

折腰為五斗強言筦庫職譬如彈隨珠徒喪竟何得坐

詠淵明篇令人有愧色

論交逮蓬華此道久寥邈君侯廊廟人顧我何數數夜

光忽暗投按劍驚卓犖

自分麋鹿姿食薇山之阿不意設羅門屢辱結駟過清

談脫塵尾奈此落月何

仕宦纔百日邴公有餘懽君今吏一邑蕭然懷抱安回

翔雲閒翮退學鳴在磐

外物去來無愠喜君看失馬翁倚伏

存斯言非綺

吟今幼 蹈南海遠游信雖美驚夢今猶每一

飽類那 仙足駭

居閒得三益社畢此生君才浩無際可畏銀河傾孤

軍犯大敵半夜壁屢驚

君有中山行巖風彫塞草日月遽如許相從恨不早當

呼伯雅君看子玉山倒

次韻任況之

谿山豈遠人吏縛苦難到豈惟畏簡書誰與同嗜好我
作汝穎行蹉跎春事老况逢懷抱惡千里風霜冒故人
知我歸尺書遠見勞似尋西溪約故遣一介報何時脫
韉鎖著我林泉帽願言絕臧否安用分瞭眊世故定可
憎覆車寧復蹈立共醉山翁同看拚離倒

次韻二仲已贈史得之

春風回東臯春雨溼田舍芒屨問脩竹小圃條疎柘史
侯得此趣十年官早謝定知猿鶴怨衣繡空行夜世無
摩詰手誰見輞川畫且復浮沈款段聊叱咤

次韻趙承之數詩

生拙自謀老去復誰諫二年此流落汝豈宜仕宦三
不辭難堪妻妾訕四海將安歸面語風裂肝五鼎
食誠言豈容贖六韜素無奇破敵未有謀七十古
所稀田園當早辦八駿方竝驅瑤池朝與宴九牛亡一
毛安用蓬蒿鷄十室請老焉佩苙吾敢慢

送伯達兄赴嘉禾

懷玉案此詩在崇寧二三年間作

我生三十餘憂患恰半生飄飄萬里外偶存三弟兄去
去復遠別朔風催客征如看各華髮豈免兒女情五載

臥箕穎分甘一塵坵
在哉生理拙口腹不解營
各逐升斗

君乃薄書嬰壯心已灰
稿集豈不復萌莊
鳥偶懷

嗣宗求步兵行藏本無意
簪組鴻毛輕脫去西風塵
江山照人清扁舟五湖月
千里爲尊羹行著下下考
願辭赫赫名青衫道旁吏
時哉那可爭

和呂居仁宿盤溪

懷玉案宿盤溪詩東萊集不載

君詩如芝蘭君操如松竹
寧當食舍魚坐待商掩仁
義已作高閣東長吟失憔悴短

四壁空惟有三冬足我懷
高少游已辦巾一幅願言
山中友先登惟子獨須煩
懸河辯令我千兔禿歸來
詩滿囊大勝富潤屋窮通
有定分鳧脰悲所續一醉
盤溪堂自取君詩讀

賀李行父遷居盤溪

揚雄無儋石而有宅一區
陶令官可棄未免愛吾廬
古來賢達士忘世未忘軀
豈知美惡閒共盡同籛條
平生李居士挈攜四壁無
常有好顏色直緣身世疎
前年家城東一椽爲有餘
今年家城西隱几猶昔吾
此生正如

此夢覺兩徐徐會何置欣戚舍舊新是圖吾儕真小人
問訊填里閭聊爲盤溪喜德鄰良不孤益知水竹深中
有山澤塵雖非三宿桑且學壺公壺

次韻信中郎官庵

飛流半山來忽作長劍倚吾知有奇境何畏虎尾履郎
官初得名山川雖信美誰能此巖居暫寓非終止吾儕
世外緣壯心殊不已每譏懷與安同是非夫恥忍飢啖
藜藿且博一笑喜更尋雲外人安得助薪水伶俚穿鳥
道窈窕下澗底路迷煙草合欲往不得跬登樓亡其梯

航海失一葦仰觀二三子腳下雲埃起山靈若相戲危
石折屐齒憂我不再來遺恨丘壑裏借君談天口駭我
未聞耳秋高山更奇後會志益偉捫蘿貴先登噬臍無
效此與君控扶搖赤腳踏清泚

僕以事至洛言還過龍門少畱一宿自藥寮度廣
化潛溪入寶應翼日過水東謁白傅祠游皇龕
看經兩寺登八節九愛之復至奉先作此詩以
示同行僧超暉

崢嶸兩山門共挹一水秀灘聲千鼓輦石壁萬龕寶何

人植翠柏幽徑出塵囿金銀佛寺古夜籟笙竽奏僧稀
梵唄少石險松竹瘦惟當效樂天早晚棄冠綬

子寓洛陽寶壇有僧悟超類有道者與語論事能

援古證今蓋未祝髮時讀孔氏之史書涉獵大

義為浮屠猶不廢今老矣不復讀也形骸枯槁

真能遺世故而玩死生者送子至龍門陪子游

東西兩山作此詩別之

我生江海上性與魚鳥逸端來入世網竟坐形骸役此
心本洞然六月遭怵迫常恐忘迹熟主人不勝客道人

偶相逢宿契類疇昔巉巖秀眉目灰槁心木石語我學

追難吾徒猶不力紛華久風靡外慕失閭閻卑之毋高

遣去身外物未能忘飢寒衣布飯疎糲此語君自味

二道在咫尺閱人吾雖多子獨無荆棘送行聊過谿共

躡登山屐

有為超作紫方袍投之輒藏而不服曰
吾教有褰色衣無是服也子益高之

次韻范信中

灼軍山林土木無軒冕意乘流亦悠悠得坎便止止平

生劇孟徒作詩建安似曹劉或爭先沈謝何足擬人窮

工天或相夫子念君綠髮初四海一身耳要見元

馬里立自致許君窺潘籬京以身後奏翩然復躡
非昔隱几功名頗見迫終欲老雲水豈料小小築
知城市裏從茲魚來物不足置愜喜用尋 盱遊無
汝顧士我有權秤一 之 樓箭美杖屨日往來風流
豈不偉

次韻趙承之留別

出處事莫立昔請今則疎一從畏軒冕意遂甘泥塗種
髮日就白衰顏寧再朱壯心空萬里老病寄一區故人
來蓬海過門問樵蘇平生詩酒豪醉倒扶吳姝憶昨試

心笑談鼠盜無雞牛本同割刀几無精粗去去 可陽
尚以爲君娛三年方赤地政成少踟躕古來賢守多
略想可圖民言或有酌近數崔大夫惜哉事大謬誰
爲焚丹書

小斜川 并引

予近卜築城西鵲陂之南衣層城遠流水結茅而居
之名曰小斜川偶讀淵明詩辛丑歲正月五日與二
二鄰曲同游斜川各賦詩淵明詩云開歲倏五十今
適在辛丑而予年亦五十蓋淵明與予同生於壬

子歲也

懷玉案淵明詩本是五日叔

疇窮既略相似

而晚景所得又同所乏者高世之名耳感歎茲事取其詩和之以遺行甫信中巽夫三友請同賦庶幾髣髴當時之游而掩彼二三鄰田之無聞也當以榜子堂上

我老不自愛幾時真罷休浮沉間里閒漫效馬少游
來五十七化逝水無停流胸中粗已了浩蕩欲沒鷗淵明
我同生共盡當一丘試築小斜川佳名偶相儔亦復辛
丑歲與公更平倡酬當時二三友得如我友不武詩俱

不傳疑有湛輩憂聊將桃李句瓊瑰副吾求

賦鼠鬚筆

長元案此篇永樂大典缺載從宋文鑑補錄攷東坡外集第七卷亦載此詩未

知孰是

太倉失紅陳狡鼠得餘腐既興丞相歎又發廷尉怒

肉餒餓貓紛髯雜霜兔插架刀稍樂

一作健落紙龍蛇驚

物理未易詰一作知時來即所遇穿墉何卑微託此得佳

譽

子莊約況之遊西溪不至任有詩次其韻

邊城無一娛孰云從軍樂惟有退食閒柴門可羅雀念

我江湖人久負漁樵約安得漫浪遊時解冠帶縛令尹
我輩人孤標寡然諾晚逢任參軍詩思湧泉落裏飯從
子來隱几訪南郭庶結三友權一笑忘杯酌西溪綠已
漲渚柳風交錯目斷君不來孤鴻沒山腳

寄題岑彥明猗蘭軒詩

羣芳爭春風百態工嫵媚毛嫵與西施未易笑倚市豈
如空山蘭靜默羞自致幽香不可尋獨秀繁露墜高情
謝簪組遁世漢綺季端來從子遊定覺同臭味岑子少
絕俗厭貧聊試吏官曹冷如水終日

子未能三徑

歸故作九畹藝後來當勿翦伴我司庾氏

彥明為洛司
古代者乃吾

兄仲南
是也

和趙承之竹隱軒詩

莫將不貲身玩此有限年必待三選足何時賦歸田陶
令甌無粟阮公不言錢可憐六尺軀坐受衆目憐我正
犯此戒隱憂浩無邊幽懷祇自知攬佩悲芳荃聞君昔
種竹妙意誠超然欲伴歲寒老此計將終焉鬱環堵
中清風自招延林泉有餘樂簪組未易牽早知文章累
不願銘燕然一爲世所羈遂與昔志捐富貴豈不欲孤

高易濟顛翻然回吾駕造物報爾天辛苦自纏縛老蠶
迷再眠邯鄲一夢破懷抱良躡蹻寄語山中友信歸在
言前耘治秋水淨掃灑春風妍君言誠起余肺腑不待
鐫強顏爲升斗情態等市墜投絃亦從此過君請擊鮮
雖微鹿門隱不愧竹林賢放懷繩墨外俱作平地仙

寄題任況之樛翁軒詩

豫章生而奇蔚有千尋志柯爲直見伐根中萬乘器自
貽斧斤厄信坐文章累不如樛與櫟生理默自遂榮枯
同蒿艾老死徒棄置我願處不材一官隱關市豈知夏

畦勞乃負淵明愧卻羨任公子蕭然居畏壘彈冠聊爾
爾頗似漆園吏官居接農舍稼穡雲靡靡放衙日亭午
吏散飽春睡此語慎勿出請爲倉庾氏

和叔寬田園六首

早歲厭華屋曲肱慕飲水躬耕二頃田僅可畢祭祀長
饑餽粥憂每抱瓶罍恥雖知學稼拙豈不賢乎已衰才
謝嚴徐吐吻上插齒各從我爾好勿問誰愠喜

平生粗知田疆理南復東常祈五日雨未厭十日風紛
紛秀莢恐害嘉穀叢芟夷絕根本肅殺死秋冬坐獲

霜莒收庶幾柔盛供一飯食我力願與農夫同

芄芄稼運雪老少紛在場未稼已困雨杭稼亦沒秧計

窮光羣望敢愛牛與羊可憐拾麥人不憚道路長號呼

泥水中滯穗收殘黃對之懷抱惡寧忍自舉觴

重陰自凝結雨脚方四羅懸知茅屋下寧有襦袴歌終

年望一麥此志今蹉跎平疇亂蛙蛤原隰長醉莎哀哉

南甌人休戚均爾多朝陽何時出赫赫敢滯疴

縣官真愛民使者交農徃課吏有殿最期使田野淨蒼

蒼豈遠人禍福依民聽欲知豐年報常鑒德業盛近聞

河湟復羽書獲萬姓吾無矢石功甘此夏畦病

十年資章甫人棄我亦閑得從長沮遊時把嚴陵竿本

非厭作吏未忍違故山朝來行西疇果腹惟三餐信哉

負郭美五斗何足于長為田舍翁所樂非所歎

張幾仲召還朝其幕府趙承之送行至漳水用杜

子美詩為韻作詩十篇既還孫志康亦取其韻

追送邁方官并門因幾仲之來遂得諸公相遇

今幕府例罷不能無離索之意故亦用此韻以

見意廷博案據此則此十篇為蘇邁之作矣否則邁或過字之誤

元戎度量六二坤直方好士常从席疾惡如探湯威
名在夷虜功烈紀太常臧孫自有後何必諫如棠
承明用儒將那知有程李坐制犬羊羣泥封一九耳平
生晉公子從者皆國士誰爲穀中游狐趙何難擬
聞公卜菟裘欲訪有魚稻綵衣歸林下池塘共春草賢
者享三樂世俗未易道但恐東山心上意還不報
我生良多難已安懸磬室端來強斂板詭詞學造膝枯
荻那復春羸兵敢借一振履獨商歌知音賴師乙
君從河朔來言尋子桑飯跼躄自忘形請交不敢憚念

君青雲士我是江湖散共爲逍遙遊未用相推挽
與君期歲寒窮堅老當壯相從茅茨下不羨凌煙上仲
由志亦陋傷哉生無養豈知衆所憂簞瓢有佳況
三士從公歸浩然志已諧嗟余哭窮途命也與時乖落
日慘關樹淒風生庭槐杖藜空徙倚抱此難吐懷
士貴得所託結根悲兔絲長松在萬仞豈爲寒暑移道
義倘可棄投歸吾不辭區區寡所合知我殆非私
我營渙水居晏子近市隘聞公欲卜鄰會築于門大暫
爲蒼生畱行作歸途戒從此敢言交紵衣仍編帶

并門逢惡歲寂寞如在陳况我官獨冷對客寒無茵謀
生求二頃藁門安賤貧明時非自棄願作畎畝臣幾仲方卜
居穎昌約爲閭里相從之好

送趙承之官滿還朝

先君昔論交士爲天下取同升顧周行歲晚逢吏部俱
懷上明恥共棄夫子惡君方汗血駒早就凌雲賦千里
不難到乃願伯樂顧懷謁來中山自許相如慕荊州一
得見意已輕萬戶我時望膺門通家愧文舉顧茲豪傑
人驥尾失早附蹉跎二十年塵滿并州路班荆話疇昔

墮淚髮垂素中郎真有子盡以功名付文章蓋餘事剛
茹柔不吐聊從兩油幕謾借將軍筇笑談出羽檄橫槩
縱奇句吾聞明天子赫赫長治具網羅到巖穴况子籍
甚譽鐫功燕然山行有千載遇豈宐山谷中尙使騏驥
驚請緩三逕歸執筆太史柱

送王晉之還朝

承平絕羽書盛德戢武威將臣歸宿衛禮樂班王畿君
侯褒鄂裔汗血餘光輝馬上談詩書笑學孫吳非往年
綴內朝緩帶臨戎機駕言樽俎閒已覺枹鼓稀我卜穎

水居里社得所依方慙赤丸俗遽賦杖杜歸歸朝侍玉
輦絡馬黃金羈封侯自有骨坐看擇肉飛

聞潮陽吳子野出家

子昔少年日氣蓋閭里俠自言似劇孟扣門知緩急干
金已散盡白首空四壁烈士歎暮年老驥悲伏櫪富貴
比浮雲妻孥真敝屣世事如余何禪心久空寂世閒出
世閒此道無兩得故應入枯槁習氣要除拂丈夫生死
易趨舍志匪石當為師子吼佛法無南北案屣無入聲
疑當作屣
用韋蘇州寄全椒道士韻贈羅浮鄧道士三首

是身如傳舍富貴同過客齒髮日夜衰悲哉卯投石幽

人臥林下沉澀餐竟夕應笑蘭亭游回頭已陳迹

神仙豈無路試訪武陵客天河尚可到歸驗支機石世

人耳目隘露槿那知夕同趨桃李蹊肯踐商顏迹

異時公子貴珠履三千客人生一飯飽安用家萬石百

年過隙爾朝不及謀夕吾駕當早回覆車豈無迹

次韻和韓君表讀淵明詩餽曾存之酒唱酬之什

彈冠初為米挂冠不待稔人言學陶生此舉安能盡陶

生物表人世網那得窘邈如孤鳳鳳翱翔天際嶺聊應

寓詩酒不在朱絃韻會韓輕軒冕雅意妙無畛遠尋柴
桑游時遣醉帽隕陟世憎儻來歸耕猶有準糟床得佳
友麪蕪粗可信攝衣請從之嗟我獨後警僕不能飲欲
學而未至

送趙儀之丞汝陰

先師詔後人學優仕有餘治身猶農功勤惰報亦如公
子生華廬儵然山澤癯胷中一匕壑結髮談詩書閒平
風流在自與常人殊清華通帝籍簪綬輝里閭我獨求
試吏十室聊卷舒未起青雲心且與黃卷娛淮堦久薦
饑待子沽焦枯前賢迹相踵咏歌載西湖麥秋未可期

在哺當勤劬作詩聊祖道請以書鄰虛前之自名其
室曰鄰虛

送葉少蘊歸縉雲

昔直承明廬誰似先生早前無雒陽人後笑馮唐老機
雲謾聲價班馬空詞藻豈知淵源來尚覺河漢小斯文
歎未墜妙意付幽討言乘刺史藩曾視金鑾草飄然香
案仙宍著蓬萊島未忘經濟心甘為窮鬼笑手援溝壑
危自上蠲賦表不知古襦袴能活幾枯槁端如德星臨
民瘼一驅掃方安壘遂政遠賦陽城考越吟念莊舄贈
策嗟秦繞江湖計不疎經史心未了但收王車歸三徑

不足道平生林泉志久矣軒裳貌遠同謝安石樂比東
山好蒼生獨未買政坐功名擾漢庭求諸儒慨想前輩
少不用歎周南亟聞宣室召

案蒼生獨未買買字誤
原本同或是猶未安

送八弟赴官汝南

丈夫志四方彈冠苦不早終童來請纓賈誼試三表二
子俱弱冠功名滿懷抱要非江湖士未易語枯槁君年
逾三十閉門事幽討父兄逼從仕攬轡方稍稍久安田
舍樂寧坐元龍笑白髮始為郎定似馮唐老效官翹葉
閒區區營一飽雖知漿饋薄要使人無保淮蔡山川美
民淳足魚稻作詩慰所思夢繞池塘草

登峻極頂

言登嵩高峯結束兩芒屨攝衣上天梯股栗戰鞞礪不
知幾流汗躍出萬仞壑剛風被太虛塵世俯下濁依稀
兩仙童遺我一丸藥平生井底蛙未見宇宙廓四維忽
騫舉小知為磅礴得窮恢譎眼賴有騰趯脚東觀扶桑
升北瞰天河落不須議雄尊培塿眇廬霍

渡泉嶠出諸山之頂

岑峯蔽日月左右信艱哉萬壑共馳騫百谷爭往來鷹

隼旣厲翼蛟龍亦曝腮崩壁迭枕臥斲石屢盤迴伏波
未能鑿樓船不敢開百年積流水千歲生青苔行行詎
半景余馬以長懷南方大炎火魂兮可歸來

叔父生日

百川赴東海如走萬國朝橫岫列嵩岱衆山失岌堯吾
道豈不尊凜然干雲霄斯文有盟主坐制狂瀾漂天實
相我公高臥不知招手持文章柄燦若北斗標末學病
多歧寢令世俗澆中商日充塞仁義愈寂寥造物真有
意俾公以後凋羣邪終放鄭正始會聞韶過也匪私祝

彼蒼自昭昭後生方有託未用憂箠瓢

溝瀆嗟尋常固爲吞舟厄風無九萬里焉載垂天翼老
人臥箕穎初非厭簪紱時哉莫吾容道大俗隘迫虎兕
歌曠野鸞鳳棲根棘蒼生謾悵望吾道何欣戚卜築殆
將隱門無翟公客高蹤躡巢由援手謝鹵稷我觀造物
意申甫爲時出未應茲偉人獨不裨袞職功名世所趨
富貴亦過隙豈知難老福天以壽有德亭亭南澗松不
羨棟梁索方茲閱寒暑寧欲顧匠石世閒出世閒此得
無兩得回首承明廬摩挲看銅狄

鬱鬱澗底松千年養奇幹盤根入窈窕翠蓋摩霄漢巖
深飽霜雪路絕窺輪奐空回牛刀手屢發匠石歎物生
非不逢得天地所贊雖微棟梁求幸免斤斧難我公廟
堂人端委四夷憚豈惟福蒼生高風激貪懦云何臥箕
穎當宁方宵旰吾道久寂寥賢愚良未判汗顏與血指
袖手寧坐看卷懷霖雨心警策露電觀形神妙自契眉
目光璀璨長松信可倚柯葉四時貫東風漫滋榮寒雨
徒零亂何異楚靈椿春秋安可筭
物居覆載閒陰陽爲盛衰我觀衆草木春風不相遺春

風蹙能榮還有搖落時區區諉消長歲月胡能支世人
如草木世態豈異茲擾擾方寸中坐受寵辱移晷錦方
自眩飲水誰汝知可憐千金軀坐困毫與釐大哉孔孟
志夫子真能師浩然剛大氣直養充四維貧富未易動
寒暑何從窺塞馬無倚伏昭琴謝成虧還觀儻來物造
物戲小兒矐仙事吐納閱世猶有之至人不導引眉壽
何復疑惟應廣成子當與此心期

贈詩僧從信

信學詩
于參寥

吳山翠如藍越水碧如銅山川吐奇秀儒釋俱爭鋒接

跡有禪老提綱古宗風其餘將詩律島可不足攻我久
客塵土雖窮詩未工要知筆硯廢似缺山水供上人三
吳來句法乃有從老潛已黃壤弟子傳清雄益復訪雲
水高情謝樊籠試草北山移為我招琴聰錢塘琴僧思聰亦妙于詩
文久游京師不歸

送鄉僧世鵬遊嵩少

吾蜀士尚氣憑陵以相高儻無勝已友便絕平生交詩
書將吾軍道藝恃所操寧甘斃百戰詎肯挫一毫氣俗
未易改波瀾到方袍世鵬此其流何止事風騷我觀浮
屠法成佛須我曹榮枯寄夢幻生死真鴻毛恨子太孤
直嶄然出蓬蒿須防斤斧厄且為聲名逃空山人迹少
晏坐狐狸嗥三年再見子庶其免風濤

訪江令德脩置酒泛舟

微雨止復作柴門蓬蒿積城隅得幽逕違淖試躡屐吾
邑有君子官居似禪寂惟聞弦歌聲不見愠喜色公庭
絕筍簞東閣亂書帙蕭然拂塵榻容我不速客清風掃
煩溽淺沼弄寒碧小飲起縱棹荷翻珠的皪我本江湖
人久負雲水役釣竿未入手越吟同莊舄君行賦杖杜

我分安蓬華他時剡溪船永謝言游室

次韻曲水泛舟四首

曲水賈文
元公園

節物自催迫意閑歡有餘
駕言二三子往尋隱者居
城隅有喬木人言于公園
當時乞身歸買田將結廬
悲哉絲竹地今為狐兔墟
野色映脩竹清溪數游魚
驚風下木葉策策紛填渠
俯仰成今昔歎此卜築初

謫仙來人間風流占名城
時將琬琰句自和鈞天聲
好語一題拂羣趨耳爭傾
溶溶此溪水似契高人情
未許五湖去聊為一舟橫
我意正浩渺酒觴且徐行
仍呼明

月來孤光與簷平邈焉想塵寰萬類方營營

歲晚得膏澤薔花香滿邨
稍令催科帖迤邐不到門
我有賢太守手撫瘡痍痕
未遠捨我去壽公福祉繁
一飽誠難得敢忘肉骨恩
爭看刺史天扶攜上牆垣
忽驚麋鹿姿中有誠意存
顧予一屣氓聊誦野老言

性不事軒冕從公卿遊田
歌扣牛角誰意樂府求公
有三島客凜然氣橫秋賦
詩雨未厭卒歲當優悠越
吟何太早言尋丘壑幽但
恐元龍笑汲汲謀田疇寄
語玉澗友達人貴乘流拄
笏看西山不妨茲唱酬

訟風伯

天胡久不雨我欲訟之天二麥槁欲死驕陽猶熾然重
陰數布野雨意來無邊未許一濡地輒遇西風顛擺搖
澗谷響寧復畱雲煙雨師良已勤風伯殆未悛天公縱
此爲忍使暴我田默訴若有荅不待巫史傳昨者六七
月屋溜如繩懸淋漓逮十日奔突潰百川行旅已斷道
閭閻欲通船不藉屏翳功日星幾變遷我請酌民情血
誠通帝淵風雨要有時乃不爲咎愆赤子仰粒食云何
絕其煙徒閔負販勞不憂稼穡先怨譴滿南畝懼忻爲

市塵謾說昏墊害欲誇掃除賢何曾補日月空祇畱創
年區區訟風伯聊賡退之篇

雨後見月

薰風轉亭午流汗浹絺綌隆隆空山雷跨海飛雨黑芭
蕉集亂響風竹瀉暗滴懸知歲有待已喜瘴先滌沈沈
璧月上稍稍星河出枕簟延清光草木返寒碧幽人夢
未回良夜誰與惜隔籬喚西家倒榼共餘瀝西家長苦
貧而有好顏色終年飯半菽愛酒無從得嗟余不解飲
看爾時舉白豈不賢老兵聊慰羈旅夕

次韻大人五更山吐月

一更山吐月鑑影搖空瀾懸知今夕遊不減蓬瀛看淨
霧掃餘瘴清曉戒初寒行樂不可遲及此桂未殘
二更山吐月玉杯側清夜誰知艇子船獨釣澄潭下幽
人酌桂醕冰碗白玉藉他時羅浮錄父老成佳話
三更山吐月半壁沈沈起無言三友歡夜夜仍會此羽
毛見秋蟲鮮甲動沙水此味世莫知勿言驚俗耳
四更山吐月紙帳驚虛明披衣訪黃冠野渡孤舟橫東
縵旋乞火犬號驚夜行歸休勿久娛霜露滿山城

五更山吐月纖纖猶燭幽寸陰惟此夜敢辭數登樓寒
砧遠隨風鳴蛩亦悲秋凭欄獨搔首微吟和漁謳

贈王子直

南行幾萬里親舊書亦缺誰知傾蓋交乃勝白頭節去
國日已遠淒涼瘴煙窟未著絕交書已歎交遊絕門前
空雀羅巷語紛鳩舌怪君一事無訪我此窮髮自憐甌
生塵每愧美屢頡何以爲子娛江水清可啜男兒重志
氣勿使變窮達寧甘一瓢樂恥爲五斗折火急數相聚
回頭君欲別一榻當再懸重來爲君設

和叔寬贈李方叔

管鮑死已久交情雲雨翻平生我知子窺見牆及肩老
 驥歎伏櫪壯士悲暮年百金空鬻技未分齒髮殫哀哉
 兔絲蔓生理寄所纏君看秋風至掃蕩何時安誰令三
 徑荒投老食屨艱短綆謾自持欲引百尺泉造物不我
 私同彼草木繁不求桑榆暖乃慕松桂寒學稼雖可賤
 樂志良獨難當觀五鼎食不異瓢與簞卜築願俱棲勿
 學雞相連作詩置坐右勉視後者鞭

用伯充韻贈孫志舉

朱顏染黃茅自意嶺表人長恬服世俗敢愧歎菽貧送

車反自厓異獠紛來賓蛙蜩與蜺醢敬我如族姻南夷風俗

非姻家不得與海風吹余舟夜渡徐聞垠往來一漚間

勞生竟非真重尋江南遊再款空同闔山中有異士束

書來卜鄰留中出虹霓奮袂勇且仁索居口枯槁賴此

意少春當年老子公硬語本為民終身雖坎壈誰得疎

而親臧孫固有後仲子先離倫不憂廊廟遲綠髮未肯

銀季子又一奇武庫戈矛新片言折鹿角不許枝詞諄

近聞獲麟書還許登成均歸歎汶上兄器新人惟陳志

兄以春秋第一
一人登第

斜川集卷第一

[Faint bleed-through text from the reverse side of the page]

斜川集卷第二

眉山蘇過叔黨撰

湖口人李正臣蓄異石廣袤尺餘而九峯玲瓏老

人名之曰壺中九華且以詩紀之命過繼作懷玉

案坡詩作于
紹聖元年

至人寓迹塵凡中杖頭挂壺來何從長房俗眼偶澄澈
一笑市井得此翁試窺壺中了無物何處著此于柱宮
昆耶華藏皆已有不獨海上棲瀛蓬我聞須彌納芥子
況此空洞孰不容何人誤持一嶂出恍是九華巉絕峰

令人卻信劉郎語當年霹靂化九龍誰將真形寫此石
太華女几分清雄終當作亭號秋浦刻公妙句傳無窮

和大人遊羅浮山

懷玉案坡集有遊羅浮山一首
示兒子過築城亦有和作時紹

聖元年初

到惠州作

我公陰德誰與京學道豈厭遲蜚鳴世閒出世無兩得
先使此路荒承明謫官羅浮定天意不涉憂患那長生
海涯莫驚萬里遠山下幸足五畝耕人生露電非虛語
大椿固已悲老彭蓬萊方丈今咫尺富貴敝屣孰重輕
紹茅願爲麋鹿友無心坐伏豺虎獍况公方瞳已照座

奕奕神光在天庭出青入元二氣換妙理默契黃庭經
但願他時仇池主不願更勒燕然銘稚川刀圭儻可得
簪組永謝漢公卿腹中梨棗晚自成本無刑荆棘所平

白水巖湯泉

懷玉案紹聖元年坡初到惠州
有湯泉詩叔黨此篇應是同作

世閒詭異那可詰地中火出連岡脈只知驪山天子浴
未信窮海湯泉出方池不須綠石甃小沸自與澄沙白
涓涓微溜架巖谷郁郁佳氣丞石室滿山松柏香自送
何用椒蘭熏四壁從來佳境與人遠野老山僧那解說
雖云得地古招提未遇賞音同汨沒一篇今得謫仙詩

當與繡嶺爭雄雌

海南多鹿豨士人捕取率以夜分月出度其要寢

則合圍而周陞之獸無軼者余寓城南戶外即

山林夜聞獵聲且有饋肉者作夜獵行以紀之

霜風肅肅陵寒柯海月濛濛翻秋河空山無人柴徑熟

豨肥鹿飽眠長坡山夷野獠喜射獵腰下長鋏森相摩

平沙髣髴見遺跡踴躍不待張虞羅均呼夜起山谷應

披快草未窮株窠何人得雋喜叫絕脔割未羨青上多

今年歲惡不可度竹間有米田無菜耕牛口欲登鼎俎

野獸脫命理則不朝來剝啄誰有饋愧父老勤已戈
一言願子不我忽暴殄天物神所呵

送人泛海北歸兼寄諸兄弟

冥冥天水吞為一夜依北斗占南北危樑月吐蛟屨氣

半山忽隱長鯨脊起看檣頭雉尾轉一帆千里日未足

此身何止輕鴻毛到家始覺是真肉怪君胡為冒此險

象主非所役凜然風義照古人尺書為我通消息

當時常校尉掘鼠貧羶從屬國茫茫海闊雁不到

長欲繫書空憫默憑君語諸季孟耐事忍慙真子職

面唾勿嫌解自乾盜金卻償安用詰杜門只作田舍子
來往江鄉乘下澤三言想見栖如雲船還時救三言察危

次韻謝民師

七鶴過海仍與蹤澹然如將沒齒疏人生知寄何足道
量員貧賤隙白駒飄流僅似六言夫子飢坐弦歌古儋耳
不堪泰嶺望家山敢有玉關生八理廣文才名三十年
出窮直到寒無種將軍夜行遇醉尉山道解衣嘗刺船
一知雷雨來新渥歸路江山宛如昨飢人但覺靴煉美
變患始知田舍樂夢中猶記魚和濡莊叟屢困監河枯

物因競病歌歸賦寧復燦爛悲窮途知君篤學真為己

不從世好惟耽此作詩頗似建安風取友更同鮑叔義
我聞得士朝廷尊搢紳所寄惟斯文象犀珠玉本安用
猶使四海爭趨奔高入處世誠難矣絕俗驚愚空日六言
坐分瑚璉廢清廟澗毛何山薦天子我羨平生馬少游
不願溝瀆容吞舟夜光明月詠自闕按六言或恐疑輕投

次大人生口

懷玉案坡集無生日詩此云世里遠
謫南海瀆及羅浮至今餘怪珍益紹

聖元 仕惠州時
作坡集偶佚之耳

陰功若以物假入酬而不非所聞丙書于公德在民

皇天有善初無親自我高曾逮公身奕世載德一於仁
迺苦卽救志劬辛豈擇富貴與賤貧久推丹心誠百均
可貫白日照蒼旻譬如農六耘籽勤自有豐年穫千困
公何屢困蠅與蚊身凡窮道益信人不俾之爵祿新
琢磨功行真人鄰直言而觸天子嗔萬里遠謫南海濱
朝夕導引存吾神兩儀張如車輪羅浮至今餘珍
惟川藥竈荆榛飛騰崩谷不可馴有道或巨尔相賓
區區功名安足云幸此不爲世俗醺丹砂儻結道力純
泠然御風歸峨岷

聞郭太尉出師大捷奚人擒契丹酋領四軍者來
獻作長句古調一首

遼人猖蹶敗紀綱鳥獸驚駭自取亡歸我五季舊土疆
有如宣宗復河湟彼會假息不自量網開三面猶跳梁
燭火乃欲犯太陽怒臂當車學螳螂支天所壞仍鳴張
含沙射影出復藏將軍義勇冠三光願以部曲除螟蝗
戶有三丁一我將遣汝積憤當少償上馬亟持十日糧
長矛短戟春其吭前者披靡後者戕係累妻子涕泗滂
將軍折北昔未嘗以巧服人尤所長勿追窮寇非深防

會遣生致如探囊匈奴自古夸豪強三表五餌稱前王
竟無一日笞中行昭君遠嫁令人傷豈知天兵自鷹揚
郅支授首須陳湯頭顱萬里行朔方遣示藁街聽徜徉
偃兵息民令有常昔居鋒鏑今農桑百年版籍淪要荒
一日冠蓋欣相望李白長歌漢道昌兩階羽舞垂衣裳

大隱堂爲范氏西田題

懷玉案坡集藥師琉璃光佛贊序云佛弟子蘇籀與

其妹德孫病久不愈其父過母范氏供養祈禱藥師琉璃光佛遂獲痊損云云知叔黨配爲范氏此范侯爲忠宣之裔詩中有行歌道上慙妻孥之語其言頗親切豈卽叔黨妻兄弟邪

范侯作園湖之隅繚以脩竹千芙蕖鵬陂下浸波瀾闊

箕山西指峯巒孤有堂翼然照通衢路人尙憶華嚴居
華嚴初來理荒廢布衣小艇披芟蒲蛙鳴不知官與私
莫來亂我夜讀書人懷忠宣及其子遺愛何止屋上烏
小范更無膏粱氣閉門一味如蠹魚肯爲山林獨往計
且隱市朝行坦途嗟我與君涉世疎短綆汲深爾自愚
行歌道上慙妻孥坐令家無甌石儲欲將大隱欺誰歟
人不吾以曷早圖未須直學西山夫槁項終爲山澤臞

愛人堂爲李幾仲賦

讀書當讀孔孟書我飽尙可推其餘莫求捷徑拾青紫

口但瀾飜腹空虛孔孟之功如藥石洗濯肝胃充肌膚
如農去莠植嘉穀如行九折遇坦途我憐赤子在遠域
疾痛不聞其叫呼何當攘臂問民瘼古之循吏誰爲儒
我觀李侯少英特閉門不曳侯王裾詩書已誤半世事
一割未信雞牛殊彈冠小縣何所爲長養善類惡者誅
作堂之名固有在要使膏澤流海隅不願力田煩賜爵
不願校讎歸石渠使我三年飯脫粟活此千人爲親娛

地鑪歌寄伯仲

野人勸我鑿地鑪纔能容膝便有餘土牀屈曲方六尺

瑾塗何必縣丹朱廣文無遺與客設蒲團但學僧跏趺
破鐺折腳自烹煮中有至樂人所無我游東南古佛刹
潭潭大屋千浮屠環牀接席如坐井白灰蓋火深模糊
貴人盡臥紅瓊瑜春風習習生四隅牽衣畱客長夜飲
一石屢醉狂淳于我一垠堵真癯儒鷓鴣無羨安枋榆
勞生養此夢幻軀二華垠慕大夫時從村叟交蹠五
煖燄爬搔味醍醐三頭一榼自取飲醉後耳熱時歌四
坐想潁川十日雨尺薪如桂求里閭此時無人知我
惜哉不與二仲俱我兄何時結茅廬小窗請試新垠

寄題折嗣益襲以閣

帝有虎臣司北門
 虛弦坐落天驕魂
 百年不收南牧
 草木尚有威名存
 平生忠義身許國
 不以金玉遺子孫
 永平弓劍空在羈
 惟有簡編遺後昆
 不知所活幾千人
 一門何止十木輪
 滿牀簪笏不足道
 萬石家風今復聞
 明窗小閣臥晏溫
 不讀孫吳看典墳
 坐銷殺氣邊風春
 取大馮小馮君

蜀人宋衍孫孤母去力學取科第遂獲見母蓋自
 蜀至許六千餘里聲迹不至逾二十年感歎茲

事作此詩以送其歸

綠槐^花衣蘆作鞭朝騎駿馬下九天
 人為君榮君未喜
 我家劔南親萬里四歲兒啼母不知
 肺肝欲裂悲語誰
 不如讀書期有立可以藉手榮吾慈
 白雲悵望天一方
 穎水之北嵩之陽
 君王一日親試策
 阿蘭不願尚書郎
 里門下馬人爭看
 對泣相持行路歎
 販輿歸侍錦江頭
 戲彩重償亂與非

范季遠作齋求詩以此寄之

流勇^之真難事要取榮枯君自味
 世閒軒冕如嚼蠟

自覺山川天下貴君如八駿方服駟帝閉正欲求千里
刷燕秣越非所願放浪煙霞躡雲水蕭然築室在人境
身與此心俱止倦飛偶學陶彭澤示疾還同老居士
政憂功名來未免吾駕不回誰公柅古來素價累高人
少室終南應所鄙

大雪日趙承之梁與可訪賈子

爽亭孫志康

不得預故有詩怨之亦次韻和一首

二士高談席絕席不數漢庭人九尺雪中忽到剡溪行
飲學髡俱一石不教彭宣到後堂只供爽氣干陵岡

忍寒排闥計大誤夫子莫悔不得將夜歸過我天正黑
燈影照坐如僧房我冠切雲服亦奇勝遊何不蚤遣知
風花瞥眼同一霎欲追此歡將奈若人閒何往不自適
陵生且復為陵鳥

和吳子駿食波稜粥

朔風吹雪填廬屋一味飢寒尋范叔綈袍安敢望故人
藜藿從來誑空腹近聞陶令餅無儲不獨魯公新食粥
波稜登俎稱八珍公子未應譏世祿山僧一食不過午
忍飢學道忘辛苦書生事業乃爾勤夜然膏火窮今古

要將五鼎同釜鑊，簞瓢未可輕原生。肉食紛紛固多鄙，吾寧且啜小人羹。

次韻承之紫巖長句

亂山窮處聞魚鼓，梵宇潭潭不知暑。當時麻衣此卜居，自啓山林著藍縷。飛空樓觀驚造化，縹緲雲閒如帝所。道人疑是有道者，已不求人人自許。富兒爭致千金多，貧者不辭筋力苦。若非足指按大地，荒山坐變琉璃宇。南陽持節奉詔歸，夜上崢嶸攜幕府。是時六月火令熾，千騎解鞍人按堵。登臨豈爲謝公賞，七子賦詩歌趙武。

長廊月出清風生，古殿無人鈴獨語。公留三日看溪漲，白晝魚鰕落飛雨。我昔千里上太行，身世飄零悲逆旅。莫投紫巖稍自慰，欲扣僧房無可侶。有來野餉苜蓿飯，主人對客羞貧窶。何似元戎從掾吏，落日紅旗照洲渚。椎牛驪酒勞還役，號令三更傳部伍。君能筆力記其事，句法更如山峻阻。一時豪放豈易得，況有幻怪供詩取。歸來尚可詫朋友，雲夢青丘俱不數。山川雖是風物殊，樂哉信美非吾土。

信中惠竹以詩謝之

篔門圭竇百不宐大紅豔紫無所施主人愛竹尤成癖
獨欠此物如渴飢君家十畝等茨束羅生川谷壤藩籬
揀林許我恣所愛有力夜負竹不知朝來窗影忽散亂
起看簷角風離披總千山立屹不動高節白首貫四時
我方病臥呼不醒一篇忽得陳琳詞頭風去體未足道
歲寒非子當誰期明朝戢戢迸犀玉請看籜龍頭角奇
千竿共戰風雨夕記取苗裔來葛陂

次韻承之重九

庾郎自誑誇重九北海常憂客無酒肯教白髮負黃花
不爲虛名畱峴首人生能換幾星霜我非石心與木腸
乾愁漫解祇自慰消長只繫吾行藏棄書學劒猶有得
西斲樓蘭北疎勒從軍直到單于臺封侯萬戶何人哉
圖形未許凌煙上草檄觀君試豪放山陰回時迹已陳
高陽大醉情何暢爲君悲歌和哀箏請君更草麗人行
吳姬趙女兩愁絕一笑當時空目成行行且作歸裝束
子雲校書八天祿一杯且復中聖賢周南畱滯誰我憐
買田早約鷓夷子相與躬耕不計年

不睡

四鄰悄悄鼯殷牀惟有客夢不得長柴門獨掩燈有暈
欹枕未熟背已芒四更山月來洞房炯炯孤影射屋梁
茅簷窸窣鼠自齧煙樹蒼莽鼻爲祥海風蕭蕭振槁葉
谿聲涖涖決廢塘二三黃冠真可憫空祠夜禱寒欲僵
步虛聲斷翠微遠鐘磬時款幽人堂山城寂寞消殘漏
鼓角淒悲吟曉霜懸知此時我獨覺胡爲百想懸肺腸
雞鳴世務紛如織曷此頃刻聊坐忘

送呂知止

王謝風流要有種誰比君家俱得鳳慈明兄弟稱八龍
未易賢愚推伯仲應機短小精吏治千里名駒方試鞚
皎然若谷冰雪姿彫琢肺腑嫌未痛英標颯爽吾知止
割雞今欲牛刀用胡爲從事筭庫役無乃漢陰工抱甕
嗟余飄泊同閭里一味窮愁惟子共詔恩雖脫縛儀囚
未敢彈冠效王貢平生世味似嚼蠟仁壑莫年尤自縱
爲君懸榻待歸來故人蚤破邯鄲夢

送孫志康

季孫愛我如美疢孟孫惡我如藥石平生願得逢若士
庶幾愛我非姑息先生少抱王佐才早以聲名馳上國

白頭猶著從事衫正坐不爲俗子屈剛風由來有家學
不信直前能缺折世無子期誰賞音伯牙太息弦應絕
晚從南陽客塞上豈爲文章工草檄厭聞可否梁丘據
磨礪正須煩子草先生持此雖暫合鴻鵠要是雲閒翮
夜光明月遭按劍未肯碌碌同沙礫翻然賦歸一何速
越吟久自同莊舄世閒軒冕豈不欲鑿枓兩窮安所得
不如乞身向嵩少問舍求田乃良策祖生從此須著鞭
我當繼蠟登山屐

戲題姚美叔睡軒

姚侯不學蘇季子佩取六印誇閭里又不斬取樓蘭王
立功萬里還故鄉兩俱茫茫空白首車輪馬跡環四方
忽焉投劾賦陶令亦復近市師韓康結髮少來曹司仗
不在功名在刀筆不如一覺獲安眠收拾散亡山呈

送參寥師歸錢塘

我先大夫東南遊六年雲水窮投搜吹噓人物到方外
伯樂未忍輕驕驪老師一見心相投氣味要是同薰猶
塵埃豈解埋珠玉自有寶氣干斗牛作詩爲文盡餘事
勁節凜凜橫九秋俗子欲交輒掉頭我友天下第一流

余川集卷二
雖遭謗罵不少避年世久已同浮漚我昨南來自炎州
師亦方解鍾儀囚握手流涕古汴溝生死骨肉我未瘳
眾人見棄誰相休纍然獨處空山幽忽聞剝啄師喚我
灑掃茅堂三日留行行吳越有舊隱明年當泛西湖舟
贈言乃是朋友義敢效兒女空綢繆夜光明月宜自收
虎文豹縵非身謀

題岑氏心遠亭

君不見鄭崇門前鬧如市此心不礙如秋水又不見翟
公之門空設羅翻爲交情牛喜豈知靖節棄官歸五

斗難堪折腰恥結廬何必在山澤方寸湛然遺遠邇君
家小園纔數畝竹柏蕭森開桃李幽亭容膝審易安不
羨華堂收梓杞平生少游真吾師自欲浮沈老閭里故
應從事三逕樂更效子綦今隱几君看六鑿無天游婦
姑攘奪無窮已達人無累超物表雲夢胸中吞芥子紛
紛朝市我無與轂擊肩摩同一軌高情縹緲謝塵寰悵
望雲山友黃綺

秋蠅篇

秋風中人如劒芒飛蠅側翼何處藏晨憂霜露避暗壁

晚集戶牖依斜陽斜陽寂寂能幾許股翼未溫寒日
縱饒不敢近華筵屏跡何須待揮塵我方六月流汗
營營聒耳緣日眉盤餐旨潔未下筋聚噉弄吻不少
物盛衰還有數得意何曾念寒暑帳中相弔定飢
外巧尋惟蝸虎糜身槁死不足憐耳目所憎欣且去
嗟哉時節那可爭造物於汝何好惡

送仲南兄赴水南倉

憶君結髮讀書日百學呻吟事刀筆功名直欲高古人
議論從來氣橫臆咄嗟歲晚事大繆翻然自許林泉役

躬耕二頃羞甘旨櫛風雨忘晨夕十年不知簪組味
萬里能舒陳蔡厄丈夫升沈何足道渴身養志直奇特
閉門卻求文史樂勁氣豈爲窮居屈信哉自有絕人處
坐使懦夫聞有立邇來彈冠本非好龜倪聊從父兄迫
區區試吏倉庾閒定知蠟屐何曾得嗟余白髮亦自笑
眷眷一官乃雞肋明年驅車走太行政坐相如空四壁
秋風濕水各相送未覺軒裳勝蓬華鷓鴣儻獲一枝安
此外所憂非我力

謝公定以所藏文與可詩示其孫驥驥有詩次韻

骨冷能詩庾開府妙句天成醉翁許醉翁已作神清游
伯牙絕弦空千古謝翁家無甌石儲獨富牙籤收蠶楮
詩豪遺墨宛在世不與俱化土後生無復見老師
句法凜然猶可度幼孫風流自一種疑是江東王謝伍
君不見西京柱下太史公雷滯周南歎無補傳家有子
能續業執手潛然只虛語子孫他日繼文翁太史家風
爾乎取

志康得魚或勸捨之諸公有詩議未判吾誰適從
亦賦一篇

谿魚有如緣木求縱有瑣細不受鉤我居恨不
長江巨浪一葦游得魚滿船魴鯉鯪莫歸獻烹魁會
邇來心吟思命騶齋廚空無萍藻羞披挾泥沙窮濶
掇拾小鮮饌糗餼三噍井上或可伴先生道眼無全牛
虛心觸物如虛舟獨未辟穀師畱侯手持巨餌安所投
彈鋏時有馮驩憂南音不變鍾儀囚朝蓬暮意則悠
渠有嗜殺對血流欲引西江蓋無由升斗小惠不知賙
吾言非夸亦非媮一飽等是充飢喉暴殄天物神所不
杜陵有詩請三謳

次韻 達仲豫二兄和參寥子

羅浮插天猿晝號飛步絕頂觀雲濤庶幾神藥兩童賜
日暮空歎西山高道人航海曾何勞久將身世輕鴻毛
只恐西湖六橋弓無人主此詩與騷

題王進之 陰軒

主人愛竹真成癖門階尸席俱寒碧小軒故爲翦重闌
舍下從教筍穿壁欣然遠致數君子相對青青好顏色
公庭無事白日長寒影參差亂書帙君家將相山西種
世世剖符門列戟圖形未肯上凌煙卻掃何爲清一室

胸中定有不凡處對客何妨仍蠟展明年新筍拂雲長
夏簟琅玕足留客

李方叔治潁川水磨作詩戲之

君不見相如昔隱臨邛市文君當壚身滌器未逢給札
賦凌雲豈免辛勤穿犢鼻又不見蘇秦大困還家時失
計頗遭妻子詈誰令奔走事口舌不學周人營什二李
侯平生無一塵只有便便五經笥儒冠半世已誤身老
欲歸耕無耒耜近聞潁川有瀑布碓磨能窮谿谷利醜
渠鑿石激清流機動輪旋人力易今年麥熟春雨足車

載斗量應有備勿嫌巾袂縞紛紛飽看谿渠鳴涖涖堆
盤坐想雪如山夢中已覺錢流地待君結廬秋風初我
欲叩門來上瑞起搜湯餅掃飛羅轆釜操刀定中饋干
金何必羨鴟夷少有屬饜而已矣嵇康好鍛季主下達
人未免茲遊戲

送粹公保德通守還朝

與君相見古并門眉目炯炯清而溫天涯流落十年事
但指白髮俱忘言當時射策探月窟想騎八駿超崑崙
我時蹇步謾追逐一蹶不復驂車輪豈期末路肯相顧

漂母頗亦哀王孫青衫塵土百僚底忍飢不解安田園
壯心消盡憂患在乞憐何異從丘壠君才雅爲清廟器
未肯碌碌爭乘軒聊從州縣事下考要爲慈母時平反
吾庸多矣願自愛舍魚不取從熊蹯

送叔寬弟通判瀘南

老人出鄉不得歸西山潁水含清悲脂車獨辦入蜀計
樂城季子真男兒凌雲棧道三十里屈指渡瀘五月時
想歡里門下父老寒食上冢先墓頤吾弟平生得詩禮
大吾門戶惟子期巴川棘道人鄙遠誰肯仁義變蠻夷

蜀笻蒟醬亦安用唐蒙已死仍瘡痍請君攜泥一丸去
持此關塞安黔黎

送普融老

孤雲去來無常蹤流水曲折無定容紆餘散漫隨天風
流行坎止忘西東南嶽道人曰普融壁立萬仞疑少通
山林市朝能兩空未覺芥蒂於其胸脫身塵埃寓高峯
澹然遺世無冥鴻豈知絕物非中庸忍飢學仙噉柏松
在山出山偶然中人不吾舍吾其從漿饋未足爲汗隆
要與後學開盲聾我方處世如鉛春自知冠冕久不工

願言香火他日同二老曾當林下逢

清源大夫吳人到官之數月鑿池引泉植芙蓉大

變晉俗遂忘江湖之想作詩寄題芙蓉亭

先生腹有五車書宜著天祿與石渠一日不可食無魚
何不置之於江湖邇來得邑古塞隅飲酪披毳如羌胡
汾水濁惡由童枯不知先生何爲娛忽然寄詩遣長鬢
報我縣圃開榛蕪昔爲沮洳今可潄下灌秔稻池之餘
清流映帶紅芙蓉炯然不染先生如簿書擾擾徒喧乎
不妨行吟學三閭吏民已化愚溪愚能和紫芝于蒟于

教條自簡俗自紓三尺不犯鞭與蒲願君越吟小踟躕
晉楚未覺肝膽殊長短莫較鶴與鳧彈鋏且緩歸來乎

次韻叔父題畫木石屏風

老人萬事無心雲年來道眼等臥輪西軒坐閱車馬奔
垂天不展空鵬躡屏閒怪石千年根端爲先生來結鄰
豪端雖愧蜀兩孫要非丹青閱世人空山老幹不效珍
荆人異璞埋埃塵幸此不遭世俗昏棟梁圭瓚徒勞神

苦寒行

句芒同春懦不職縱使元冥氣凌轍三冬肅殺歸爾時

長物豈容長凜凜北風吹水冰成梁急雷益地雲翻墨
坐令貧士高掩局安得重裘代絺綌春泥漫漫薪不屬
破竈無煙愁四壁飢吟擁鼻涕流漸皸指結衣僵欲直
水南水北多高士去作達官金馬客朱門碧瓦照通都
恥著麻衣羨狐白問余何爲不錄錄反老抱關守旣石
十日春寒何所覲坐想朝陽生屋隙願將挾纊同斯人
杜陵大廈無由得南榮炙背直萬錢煥燠此衣安且吉

松風亭詞

亂一水兮清冷絕塵而兮郊坰鬱松風之參差忽飛構

兮危亭悲風來兮號滄溟寒月出兮款戶庭聽萬籟兮
發無形感窮歲兮物彫零簾舒卷兮度飛螢白露下兮
靄疎星二江東來兮勢建瓴于山右繞兮環翠屏彼柴
門兮晝常扃屏外物兮返視聽嗟世故之迫隘兮夫何
異於囹圄幸此身之日遠兮口可逃於天刑望神仙其
咫尺兮想羽人於杳冥或命駕以遨遊兮茲弭節而之
停友羣仙兮役萬靈驟鸞鶴兮駕鳳駟願執鞭兮展輪
愧凡骨兮羶腥余師首陽之清德兮超千古而猶馨偉
三閭之諒直兮高衆人而獨醒慕子房之明哲兮學辟

穀以引齡嗚呼雖九原之不可作兮庶斯人以發矧

山行

肩輿歷盡荻茆岡青山壁立蒼大行忽驚雷轉山石裂
濤頭千尺分錢塘飛空兩電寒崖碧倒影垂虹射晴日
高巖俯瞰先目眩杖策縱觀森股慄只疑天河瀉地上
又恐灑瀨飛山脊猿猱悲鳴霜樹折虎豹震動山月黑
千年水石自成竇下有蛟龍深莫測明年歲旱當汝求
暴雨一聲飛霹靂

斜川集卷第二

